

DISCUSSIONUM PERIPATETICARUM  
TOMI III LIBER VI

**Aristotelica contra Platonem obiecta in physiologia  
eorumque dilutiones**

5

Plures in naturae philosophia quam in divina Aristoteles  
contra praeceptorem cavillos effinxit, eos omnes praesenti libro  
discutiendos nobis assumpsimus, itaque primo Physico, capite  
4. Platonem obiurgat, quod principia naturae rerum, magnum ac  
10 parvum uti materiam, unum vero uti formam statuerit. Magnum  
autem et parvum duo esse infinita, infinitum essentiam per se  
et principium tertio Physico capite 4. asserit Platonem posuisse.  
Duo etiam illa infinita capite 6. confirmat, carpit id ipsum 4. Phy-  
sico capite 2. libro autem 2. De generatione, capite 3. innuit Plato-  
15 nem id quoque in Divisionibus sensisse. Idem clare repetit primo  
Sapientiae capite 6:<sup>1</sup> *Ut quidem materiam, magnum et parvum esse  
principia, ut autem substantiam, unum.*

Ad hanc primam omnium obiectionem negamus penitus,  
principia haec in Platonis libris reperiri usquam, omnes enim  
20 eius libros habemus praeter Divisiones quasdam, quarum Ari-  
stoteles uti modo diximus 2. De generatione capite 3. et forte pri-  
mo De partibus capite 2. meminit. At hae forte sunt divisiones ab  
eo in Sophista ac Politico factae, in quibus nihil tale de parvo aut  
magno reperitur.

<sup>1</sup> ὡς μὲν οὖν ἕλην τὸ μέγα καὶ τὸ μικρὸν εἶναι ἀρχάς, ὡς δ' οὐσίαν  
τὸ ἓν. [ARIST. Metaph. 987b.20 – 21]